

欽定剿平三省邪匪方略

欽定剿平三省邪匪方略正編卷二百四十二

辛酉年

三月初五日

辛巳

陸有仁奏言連日據探報高三

馬五賊匪經提督楊遇春追入川省南江縣界

賊復沿邊竄至西鄉一帶楊遇春等沿途追及

斬獲甚多並接總兵張鳳札會已隨楊遇春在

西鄉黃草坪地方生擒首逆王廷詔餘匪無多

向小巴山馬家壩一帶逃竄楊遇春緊躡截擊

慶成已派兵就近馳往協同搜剿以期兩面夾擊其後股之賊經督臣長麟分派官兵痛加截擊殲斃偽元帥胡滄海生擒老教首馬應祥餘匪數百人向龍王溝一帶奔竄復經總兵楊奎猷沿途截剿已乘夜由卦子山漆樹崖一帶竄入廣元邊境又冉學勝賊匪一股由盤屋厚畛子寶雞滴水崖竄至鳳縣白雲一帶臬司王文

勇先因墜馬跌傷腰肋仍力疾在寶雞一帶率
勇巡防一得賊信卽派義首毛得元譚盛等帶
領鄉勇五百名乘夜暗劫賊營殺賊一百餘名
生擒二十餘名奪獲騾馬長矛旗幟甚多鄉勇
陣亡十一名賊於次早前來撲營壯勇齊心抵
敵復經毛得元放箭將在前兇悍賊目射倒賊
匪退避隨由棧道大路黃牛舖北星溝草灘溝

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

一帶奔竄長麟因高馬等逆已入川境卽由襄
城留壩一帶馳往剿辦總兵楊奎猷奉經畧額
勒登保札飭亦卽帶兵探蹤馳剿又伍逆餘匪
裹聚漸多總在老林出沒經畧令總兵穆克登
布等分投進剿於賽秦嶺山根截殺賊匪二百
餘人殲斃賊目二名生擒二十餘名賊匪仍由
老林奔竄經畧現由獅山坪移至四畝地一帶

相機轟擊其高二殘匪一股亦已由蓋屋金井
架西竄又龍紹周等股賊匪探知叅贊德楞泰
大兵將近卽由嵐河鋪通草壩一帶竄入平利
縣境總兵喜明等帶領兵勇在南坪峽一帶殺
賊百餘名賊向豐口壩等處分股奔竄德楞泰
現已由平利獅子壩取道進剿截其東竄之路
並尙有零星落後之賊二三百人在紫陽洞汝

河等處竄匿等因查冉逆等股賊匪久匿老林以致經畧官兵限於地勢未能卽時殲洗現在冉逆業已竄出高二餘匪亦漸西趨勢俱殘敗長麟楊奎猷分投探剿自可不致蔓延老林內僅有伍逆一股經畧大兵設法轟擊勢不能日久潛藏一經出林官兵便易施展其龍紹周等股現經德楞泰勁兵馳剿亦必迅速成功大局

情形已屬易於得手一王洞汝河等處鼠匿零匪
爲數無多臣已飛飭該縣等查探賊蹤鼓勵民
勇盡力搜捕務期悉數掃除並將各路軍火糧
餉督飭源源運供不敢稍有缺誤

長麟陸有仁又奏言查陝省南山跨越四府一
州袤延二千五百里層巒疊嶂奸宄易藏舊
名五郎一廳實爲居中扼要之地前設通判

員並分汛千總帶兵五十名稽察實屬難周經
前撫臣台布履勘情形請於距廳城十五里之
老關口地方添設重鎮分汛安兵仰蒙

欽賜寧陝嘉名改通判爲同知嗣緣南山未經肅清
各路鄉勇正在分投防剿不能撤令入伍兼以
人民移徙無定一切兵房衙署工作未興而額
設新兵雖經酌定六千之數亦僅據都司黃瑞

於該廳守城鄉勇內挑得六百名是以上年未
將條款章程議定查寧陝鎮應設新兵上年台
布請以凱旋鄉勇補用原欲使習於戰鬥之輩
入伍操防藉以安其身而用其力今若另爲召
募不但山中無業之人半多逃散有業之戶不
肯充當並有鄉勇一途所得口食多於兵丁又
可任其去來不受營規約束人自樂爲鄉勇且

卽使召募足數而以六千名甫經入伍之新兵
分布於二千數百里之汎地在無事之時稽察
奸匪則有餘今賊氛未靖若以之抵禦數百數
千亡命之賊則斷難得力且亦徒占鄉勇歸營
之額於事實爲無益似只可俟凱旋時以各路
鄉勇酌量充補現在山內僅止伍冉二逆及高
二零星餘匪潛伏老林大兵分投搜捕計日卽

可藏功所有善後章程自應先期籌辦謹將現
與經畧額勒登保商定設鎮條款章程繕具清
單繪圖貼說恭呈

御覽伏乞

皇上勅部核覆並請令額勒登保揀選軍營出力諸
悉南山路徑情形之員先行補放叅將以至守
備各缺其千把外委等員容_臣等於陝甘出力

弁兵及鄉勇首領內隨時酌量拔補以資駕輕
就熟至各路征防鄉勇歷年應募從軍視殘殺
爲兒戲其情性多桀驁不馴若一營中全令此
輩補充誠恐人數過多難以駕馭尙非計出萬
全是以須間以兵六勇四酌派補伍所有該鎮
額兵六千名擬於陝省未經出征存營兵內抽
撥官兵三千六百名暫爲移駐其餘二千四百

名卽以鄉勇充補除都司黃瑞已於寧陝廳守
城鄉勇內先行挑得六百名作爲新兵外又

臣

長麟前經奏明將所帶隨征鄉勇四百餘名隨
後歸入該鎮又總兵劉之仁於石泉一帶防江
僱募鄉勇七百名亦經稟明額勒登保隨後歸
入該鎮統計已經挑備鄉勇一千七百餘名其
餘七百名仍俟凱旋時卽在各路隨征及各廳

州縣僱募防卡防江鄉勇內揀其精壯者派補足額至所調各路存營之兵酌定二年輪換如有願留新營者各聽其便此二年內各營存兵既經調出額缺未便久懸亦卽可以各路征防鄉勇分派充補如此酌定章程庶衆鄉勇勢分力單處處俱有箝制可以相安無事至撥補該鎮之外所餘鄉勇尙多亦當預籌安頓現在陝

甘各標遣退殘病兵丁不少正須召募補額應
請俟事竣時按營分大小額數多寡亦卽以各
路鄉勇分派充補似於善後更爲有裨至寧陝
鎮總兵以下應造衙署兵房塘汛等項本應卽
爲勘辦因此時山內尙有零星賊匪工匠難覓
木植磚瓦價值較之平時增至數倍亦只可俟
全境肅清再爲勘估建造再臣等往返札商各

路防守之兵雖不及征兵之整齊而近來操練甚勤疲弱者亦漸知振奮較之各處存營新兵能諳紀律而耐勞苦可毋須換至鄉勇一項有隨征日久每營千數百名者卽與兵丁無異又有各廳州縣隨時僱募賊近則守城守卡守江賊遠卽撤者亦爲數不少皆係習練已久於堵剿尙爲有益今若再爲添募多一勇卽多一費

而新募者鎗礮器械未爛不能收目前之效現
在賊勢窮蹙官兵到處克捷各村莊民勇自經
激勸之後頗能齊心成功自在指顧亦可無庸
另行添募以節糜費均奏入

上命軍機大臣傳諭長麟陸有仁曰陸有仁奏稱生
擒老教首馬應祥及首逆王廷詔等皆係額勒登
保長麟曾經奏過而於冉學勝一股竄入甘境經

畧會否帶兵赴漢江南岸均未提及前月二十九日據額勒登保奏帶領扎克塔爾等並兵勇三千餘名由石泉過江徑赴西鄉一帶督剿續據長麟奏冉學勝一股賊匪由棧道竄入甘境該督已抵兩當迎擊陸有仁發摺時或尙未得前信至所稱龍紹周等股賊匪探知德楞泰將近竄入平利縣境經喜明在南坪峽一帶殺賊百餘名德楞泰由

獅子壩取道進剿一節尙未據德楞泰奏到想德
楞泰趕赴漢江南岸正在與賊接仗俟大得勝仗
卽行奏報陸有仁當隨時探聽確信如德楞泰已
將龍紹周等股賊匪痛加剿殺卽專摺馳奏用慰
厯注至王文湧因墜馬跌傷腰肋現在曾否痊愈
並著遇便覆奏又長麟陸有仁奏寧陝鎮設兵分
汛事宜一摺著軍機大臣會同兵部速議具奏長

麟陸有仁之意以南山內賊匪尙未肅清各路鄉
勇現在分投防堵不能撤令入伍所有應設新兵
俟凱旋時歸入善後事宜辦理未免不知緩急五
郎地方爲南山居中扼要之區數年以來賊匪出
入南山皆經由此地是以於五郎添設重鎮以資
控制俾賊匪不能出入自由前年冬間那彥成剿
捕張漢潮餘匪督兵深入南山未經殺賊勞而無

功近日經畧因在南山搜捕高馬等逆爲其牽綴
稽延持久經畧素爲奮勇斷非有意逗遛總由賊
匪一入南山地險路窄兵力難施現在冉逆業已
竄出南山高二餘逆亦有西趨之勢老林內僅有
伍逆一股經畧設法轟擊賊匪諒不能日久潛蹤
一經竄出額勒登保自必躡蹤追剿其南山一帶
防堵之事尤係該督撫專責若五郎設鎮並無重

兵屯駐聲勢安能聯絡難保賊匪不再行竄入卽
初立營汛衙署兵房未能一律建造亦應擇其要
隘安設兵勇先搭蓋窩棚以資棲止焉有必俟大
功全竣始行募足兵額徐圖善後之理伊等接奉
此旨後務當設法速爲經理俾兵勇足數屹然成
一重鎮以杜賊匪再入之路倘稍有遲延致轟出
南山之賊復又竄入山內則惟長麟陸有仁是問

初七日

癸未

德楞泰奏言

臣

前抵安康縣屬之磚

坪知龍紹周等逆東竄飛飭慶溥等探蹤截堵

臣於十六日卽取道隴河前進十七日途次向

家壩接據喜明柯藩稟報十四日午刻有賊匪

一股由南坪竄至獅子壩當卽率同守備王英

帶兵扼住隘口截擊鎗礮斃賊十數名賊卽退

佔山梁我兵仰攻時忽金竹溝又有賊匪竄出

直撲營盤經喜明酌帶馬隊兵勇衝擊賊遂折
回溝內攀山而遁其山梁之賊經守備王英帶
鄉勇首先搶上殺斃馬賊一名並執旗賊五名
賊又退上極高山頂擲石抗拒據報又有一起
賊匪由水底河南坪峽一帶乘空東竄豐口壩
當卽商酌分兵趕截又報馬賊數十人由小蜂
啞而來卽委令叅領富陞帶馬兵前往追擊賊

見兵至卽又逃回時已黃昏而山頂之賊相持未下隨又添派鄉勇協力攻打並用鎗礮轟擊斃賊數十人賊始敗入大山共計殺賊一百餘名奪獲刀矛旗幟陣亡鄉勇候補外委敖旭一員受傷及陣亡兵勇另行查報是夜三更後賊復前來分撲各營卡鎗礮轟擊旋卽大雨直至天明隨探賊由石門子退出該總兵等一面知

會慶溥馬玉魁等卽帶兵直趨白土關邊其入
楚之路等因隨據慶溥馬玉魁等稟報探知賊
由東竄亦星夜帶兵趨至白土關詎該逆等知
北面有兵遂由南面老林直向東奔慶溥等復
由竹谿縣抄出平利之大漚灣扼截賊匪不敢
竄楚折向八角廟秋山溝老林遁逃查秋山溝
一路直達鎮坪南通大寧之雞心嶺東走竹谿

之豐溪西走大樹河爲三省通衢賊旣入山而
慶溥等官兵迂繞抄截徒勞無濟且平利安康
雖已肅清而紫陽一帶尙有王光祖餘匪千餘
人在彼滋擾隨飭令慶溥等連帶原兵卽赴紫
陽一帶與額勒亨額併力剿辦並令如有川匪
竄來亦卽截剿過其突入陝境不但顧及江岸
卽楚省亦可無虞當卽咨呈額勒登保查辦

臣

鼓勵將弁兵勇倍道趕行二十日至八角廟有
逃出難民鄧有春余彭氏等三十一名口來營
請票又經哨探兵勇拏獲賊探劉永輔龔學文
等七名訊係派來探聽信息之賊餘無要供隨
卽分別辦理二十一日翻大秋山老林路逕羊
腸又值淫雨道路澶滑仄險處一線偏崖賊匪
過後又復毀塌只得隨修隨行是日逃出難民

梁陞祥董曹氏等八十三名口搜獲落後賊匪
黃新捧張成玉等十七名二十二日由黃龍坡
紫白土嶺沿途又有難民鍾天盛陳殷文等五
十一名又前敵拏獲賊匪唐貴章等十一名俱
經隨時分別辦理隨據探報有賊匪千餘人屯
於謝家灣隔河一帶距我兵六十餘里臣於四
更發兵二十三日早雨勢漸大午刻行至竹節

溪有難民屈顯仁告知前面山梁樹林內有數

百人埋伏大衆屯在隔河文彩溝裡等語

臣卽

預爲準備令將弁兵勇直上及至山梁地勢稍

平該逆不知我兵識破率衆二百餘人一齊突

出我兵鎗箭齊發立斃賊五六十名又經副將

李應貴叅將馬應國遊擊銜德英額等帶領步

兵抄出其後賊卽紛紛竄下河壩裏圖晒淺過

河正值溪水漲發洶湧急溜我兵趕至河邊賊
衆前後無路眼見晒淺者盡被大水衝去餘賊
悉數殲盡正欲乘雨搭橋無如溪流暴漲人馬
不能站立夜半雨止次早水勢漸退臣先令哨
探見水過河趕搭浮橋兩處隨即全行渡完途
次據探報前殺賊匪大隊昨早已由石渣河而
去文彩溝之賊今早亦已前逃距我兵不過五

六十里當卽催兵翻馬鞍山時又微雨未刻趕

至紅沙溪遙見賊衆在掃箕寨山嘴屯聚

臣令

賽冲阿馬瑜蒲尙佐富僧德慶昌穆騰額李東

山馬元等帶馬步兵勇由左邊繞上山梁令温

春色爾滾達勒精阿蘇爾伸達自祥馬文斌劉

彪等帶馬步兵勇由右邊山背而進

臣

督同阿

穆勒塔珠爾杭阿孫德保富登阿明德唐玉龍

馬濟何君佐等由溝底直衝賊匪望見官兵竟
敢吶喊搖旗前來抗拒時賽冲阿温春等帶兵
由兩邊山梁壓下臣又由溝底直前因雨大泥

灘路徑陡仄我兵未能得手只殺賊一百五六
十名餘匪紛紛向十八灣奔逃我兵跟追直至
二十餘里之乾溝又殺賊百餘名擒獲活賊金
占鰲等六十九名時已黃昏雨勢愈大前途又

係箐林未便再進獲有馬騾二十三匹大小旂十四面刀矛一百六十三件隨據難民袁林等於獲犯內指出探馬頭金占鰲大旗手陳國太二名訊據供稱元帥係黃號龍紹周手下四五千入白號原是唐大信今元帥是李顯必只有三千人還有唐明萬一股二千餘人又有小藍號張家營藍號冉家營共一千餘人五家合夥

原要過江探得大兵前來他們就往東走要
湖廣不想都被官兵截住今並無一定主意總
是探聽無兵地方竄去等語並訊明各犯均係
戰手一概正法其難民袁林等訊係平利安康
一帶被擄之人均各給銀米路票回籍臣查陝
省江北南山之內只有丹學勝伍懷志餘匪已
有穆克登布等分兵兜剿諒卽日可以肅清又

據沔縣稟報高馬二逆後股餘匪經長麟截剿
只剩二三百人由寧羌之卦子山入川又近接
勒保來信以川北業已肅清惟辛聰陳朝觀李
炳魏棒棒顏勝可劉朝選湯思蛟張添倫等合
夥俱在雲陽奉節一帶滋擾樊人傑冉添泗在
太平白河亦欲前併合現在督同七十五薛
大烈永寧託雲泰等分投截剿至楚省之徐逆

查經書麟長齡明亮等分路剿殺勢亦狼狽苟
逆已至興山自必折回川境再查三省現有賊
股俱係各路官兵屢次剿敗殘匪惟龍紹周等
歷年游奕於川陝界上老山之內未得痛加剿
洗刻下人數雖有萬餘多係被擄百姓惟恃走
險苟延殘喘如官兵一得地勢不難立即殲除
頃據探報該逆已竄入川境之大寧二郎壩二

帶該處東走大寧之徐家壩西走太平之黃墩
北走竹山之向家壩長村壩等處第賊趨向無
定萬一被剿情急或恐竄楚臣先卽飛咨書麟

酌派兵勇在長村壩一帶扼要堵截且龍逆人

數較多倘有蔓延間閭更遭荼毒茲臣於二十

六日已至平利大嶺交界之黑虎廟惟有趕緊

剿辦毋論該逆奔竄何處總以剿除淨盡再辦

他股較爲妥協連次打仗受傷兵勇數人容俟
另報奏入

上命軍機大臣傳諭德楞泰曰本日德楞泰奏報仍
不過追剿龍逆股匪雖疊次截殺僅殲賊一百五
六十名並未能將首逆殲擒殊不滿意惟未令龍
逆竄楚逼入川境之大寧二郎壩一帶德楞泰卽
帶兵至平利大寧交界之黑虎廟趕緊剿辦所見

尙是現在春令雖時有雨降尙不至如夏令之多
德楞泰惟當趁此賊匪乏食之時迅卽剿盡不可
藉口兩大官兵難行致有延緩至楚省賊匪較多
兵力實單未足深恃豈可再令龍逆竄入德楞泰
務於平利大寧交界處所將龍逆股匪迅速殄平
卽或一時未能剿淨亦祇應逼令入川斷不可越
入楚境德楞泰前曾飛飭慶溥喜明馬玉魁柯藩

等扼住隘口堵賊竄楚之路倘稍有疎虞致令龍
逆竄楚則德楞泰及慶溥喜明等均當一併治罪
所有此次打仗陣亡鄉勇候補外委敖旭著各部
賜卹

上又命軍機大臣傳諭額勒登保曰龍逆一股現經
德楞泰躡蹤追剿額勒登保曾否帶兵至漢江南
岸所剿究係何股賊匪抑或因再逆竄入甘境未

經過江仍在北岸督剿前此生擒王廷詔究係如
何擒獲至今未見奏到且冉逆一股竄甘業經長
麟帶兵前往兜截額勒登保想早已得信何以亦
未據奏及至竄匿南山之伍懷志及高二餘匪前
經額勒登保派令穆克登布等在彼搜捕是否得
有勝仗及現在如何設法殲擒之處額勒登保身
爲經畧自應通盤籌畫以期剋日蕝事並著將現

在打仗殺賊情形隨時速奏以慰屢注

初九日

乙酉

額勒登保奏言據楊遇春格布舍呈

報高三馬五賊匪因王廷詔已爲我兵擒獲驚惶無措晝夜向深山老林亡命逃竄我兵緊跟追剿二十一日黎明冒雨追至長槽漆樹梁等處正遇該匪在彼掠食遙見官兵盡棄食物竄上左手大山林內逃竄我兵奮力搶上追趕數

十里殺賊四十餘名生擒三十一名是晚雨勢益大泥深尺許官兵奔馳跋涉備極艱辛該匪仍於西鄉之巴山林內輾轉藏匿慶成亦督率將備各帶兵勇於大竹河皮貨舖雷石坡等處分投探剿均有斬獲并拿獲賊目劉以和一名據稱賊營內連日歸集潰散之衆尙有四五百人畏懼官兵百十爲羣倏東忽西並無一定去

向惟思依傍老林輾轉藏匿乘間再尋別股合夥等供總兵九十在鍾家溝接到慶成知會又探有賊匪出沒老林派令都司海進龍帶領官兵由大壩關前進九十帶領官兵由舊司河前進殺賊三十餘人生擒二十餘名都司海進龍躡蹤緊追二十五日在樊家嶺見山上有賊海進龍率兵仰攻賊匪滾放木石正在抵禦不料

旁有藏匿賊匪突出該都司猝受矛傷陣亡各
弁兵勇憤恨極力進攻該匪由李子坪牟家壩
小壩西竄日內楊遇春格布舍張鳳等已在搜
剿慶成由柳樹店二郎壩趕過法慈院向北抄
截九十現抵黃官嶺一帶該鎮將等已分數路
截剿定可卽期得手臣連日由三郎舖進抵柳
樹店本擬親督楊遇春等一路將高馬等賊乘

勢一併掃除再辦別股無如該匪等竄越深山
老林迄無定在且賊數究已無多楊遇春所帶
官兵足敷剿辦刻據探報龍唐等逆自德楞泰
過江進剿後該匪聞風東趨德楞泰領官兵
由東面之關垭向西赴曾家壩八卦廟一帶截
擊慶溥喜明馬玉魁柯藩由南路之會灣渡船
口截剿賊匪未及入楚在曾家壩分爲兩股一

向得勝坡鎮坪逃竄一向文彩溝鵝坪逃竄德
楞泰此時定已自東向西追剿并探紫陽之六
道河斑鳩關一帶亦有龍唐等逆分股竄匿之
賊并聞川東雲陽一帶辛陳湯劉等股經七十
五薛大烈等於紀家寨沙沱子截剿得獲勝仗
賊匪未得東趨其勢必仍竄太平及界連西紫
一帶查西鄉之王黑壩毗連紫陽係屬賊匪往

來要路並逼近江岸近來春雨連綿江水雖已
漸漲第恐賊勢股數分歧隨處逃竄或致過江
東奔尤屬可慮臣卽赴王黑壩一帶迎探各路
賊蹤相機辦理臣現又札飭楊遇春格布舍等
務須趁賊窮蹙之際鼓勵將士不辭勞苦將高
馬二賊迅速掃除其長麟前次所剿高馬後股
賊匪王凌高等現亦至附近一帶楊遇春等亦

可探蹤兼剿

臣

帶兵東行西鄉柳樹店一帶不

可無兵現又知會慶成如能與楊遇春等夾攻

數日內蕞事實屬幸甚倘高馬賊股逃去有楊

遇春等辦理慶成仍當帶兵轉回於此一帶聯

絡聲勢

臣

因各該匪分竄所帶之兵均經分派

各路剿賊現在所帶兵力無多如抵王黑壩時

察看情形緊要將慶成官兵酌調協剿亦可得

濟至穆克登布豐紳綽剩伍逆股匪在南山內
輾轉逃匿地勢過於險阻屢次進兵不能得手

上月二十一二日又自段木橋向東南竄逃穆
克登布等探蹤進擊殺賊三十餘名生擒十七
名該匪於甕兒溝恃險抗拒穆克登布等一面
派撥官兵繞向賊東之黑溝口擇要堵截一面
設法轟逼已由金井架虎豹河西竄臣復札飭

該鎮等務須併力卽西向追剿斷不可使賊復入老林並飭總兵劉之仁率領兵勇趕赴小王澗剪草坡一帶杜賊東竄要路但使逼出南山卽可施展兵力易於辦理其冉學勝股匪近日已竄過棧西三岔及湖甸烏寨一帶長麟率師由兩當太陽寺太白堖迎截臣調總兵楊奎猷帶領兵勇二千餘名據報向華陽二郎壩前進

已飭令趕往長麟一路併力趕緊剿辦

額勒登保又奏言據楊遇春格布舍等報稱王
廷詔高三馬五賊匪自於南江地界被剿後盡

向川陝邊界老林逃遁十二日晚間我兵追至

西鄉之裴家坪探知該匪竄至巴山麻柳池一

帶相距七十餘里楊遇春等於三更發兵黎明

趕抵該處該匪業已起竄卽率兵趕出五十餘

身三ノ者上ノ事ノ者三ノ事
三ノ事
里至戴君嶺地方追及賊匪我兵先到者不過
百餘人賊見我兵甚少卽聚衆從山梁壓下我
兵併力抵禦擒斬五六十人我兵大隊已到步
行之賊奔上山頂箐林內遁去騎馬之賊順從
山徧逃逸楊遇春率同總兵張鳳副將應元寬
叅將張超張瑗遊擊李東宣唐啓文淑雅金泰司
國屏朱槐吳廷剛劉秉揚等帶領步隊官弁兵

勇上山分路追剿而騎馬賊匪中料有首逆在
內格布舍率同侍衛傅陞噶拉噶達鼐定色鼐
協領全德清善帶領馬隊官兵卽由山碾趕去
沿途殺賊五六十人騎馬之賊見追兵將近盡
棄馬騾扒上煎茶坪山梁箐林內官兵亦棄馬
搶上山林當有吉林藍翎甲兵德勒奇善見有
一賊慌忙行走正在扣箭欲射又見賊衆齊回

擁護德勒奇善大喊餘賊驚逃拋棄弓箭猛力
向前將該匪攔腰抱住德勒奇善恐爲衆賊搶
去急喊人用刀連砍二等侍衛噶拉藍翎侍衛
定色鼐等帶兵上前接應將此賊按捺於其身
上搜獲布包內有畫像經卷該犯自稱爲王廷
詔擒縛到營其餘將弁兵勇仍奮力捕殺該逆
等遁入後山老林時已更深不能再進張鳳一

路亦於林內攬獲賊匪八十餘人連格布舍一路擒獲賊匪共一百二十餘人均係積年戰手均卽正法此乃是日打仗殺賊生擒王廷詔之情形也查前奏

諭旨徐添德王廷詔爲起事首犯有能擒一名者官員則加二等陞擢兵勇則超補守備賞銀二千兩當經行令各路領兵大員欽遵辦理在案

此次藍翎甲兵德勒奇善將要犯王廷詔生擒
楊遇春格布舍等查問屬實當卽請宣

恩旨將甲兵德勒奇善加二等換給五品頂戴花翎
并遵

旨將銀二千兩發交賞給德勒奇善碰頭祇領榮幸
非常凡在營將弁兵勇以德勒奇善旣得超陞

復邀

厚賞無不嘖嘖稱羨共願爭先立功楊遇春格布舍
等又將節次滿漢出力人員保送前來臣以首
逆祇獲一人餘匪亦未辦竣寔不敢遽懇

加恩但思生擒首逆王廷詔固係德勒奇善一人之
功而噶拉定色鼐二員亦皆身冒矢石從旁接
應並查此股王廷詔高三馬五等逆自臣於漢

陰地界連次剿潰後竄至藥壩經楊遇春格布

舍等躡蹤剿辦由陝竄川由川竄陝將弁兵勇
等兼程追逐不分雨夜不避艱險帳房不到則
皆露宿糧米未到則皆枵腹非各官兵人人用
命毫無懈怠亦不能致該匪等如此殘敗當茲
追剿萬緊之際若不酌量懇

恩獎賞亦不足策勵衆心今將所保各官兵內逐加
比較擇其前後勞績尤多者開單呈

覽請

旨分別加恩又有賊隊中投出現充四川鄉勇之顧
應全苟璜二名節經隨同官兵打仗並有時假
充教匪誘賊均屬認真報效奮不顧身應一體
懇請

施恩以示激勸其餘該提督保送之人尙多臣另行
存記已諄囑楊遇春格布舍傳知各官弁兵勇

等務須益加奮勉如卽將高三馬五擒獲掃淨
餘氛再當核其功績一律奏請

皇上施恩

額勒登保又奏言臣師抵西鄉之三郎鋪據楊

遇春等派撥官兵將首逆王廷詔及其隨身所

帶畫像一張經卷二本疏一張一併解送前來

當卽率同三品職銜內閣侍讀學士胡時顯隨

營總理陝安道朱勳等親加審問該犯狡詭性
成自知萬無生理訊以起事根由一味含糊卽
其祖父之名亦不吐露實屬萬分可惡反覆盤
詰始據該犯供年五十七歲係河南西華縣人
伊祖名王珊父名王本德向與鹿邑縣屬陽路
口王家菜園之王姓一同念經燒香該犯所帶
隨身畫像卽係伊祖王珊之影其經文各件據

稱伊祖父所傳該犯於乾隆三十八年找到王家菜園見王發惠之叔王老四維時王發生有十餘歲王老四曾向我說王發生本姓朱是前朝後人四十年上我又在王發惠家住王發惠向我說王發生已經地方官拏去我畏懼逃去衆人如何起事我實不知道嘉慶元年在雙溝地方遇見劉起榮等叫我入營尊我爲老掌櫃

衆人因我輩分大又稱我爲王大叔後來張漢
潮張添倫戴四姚狗腿詹世爵張世龍弟兄高
三馬五等都是大頭目我都到過他們營裡我
近在高三馬五營內被官兵追急他們丟棄牲
口扒上石崖逃走我落後被拏等語臣復查該
犯所帶畫像經卷各件尙無悖逆之詞看來不
過藉以煽惑愚民然未加刑訊其所供必有不

實不盡但卽其連年隨賊竊發毒害數省生靈
已屬罪大惡極今仰仗

天威赫濯幸得生擒自當盡法處治使地方遠近
然共知

王章之不可犯而邪說之不可信臣師行無定該犯

不便久留在營現已解赴西鄉監禁應將該犯

供詞圖影經卷等一併恭呈

御覽如應解京再加嚴訊俟

命下之日酌派文武官員小心押解起程 仰奉

旨無須解京當將該犯寸磔揚灰取其首級傳示各處以快人心而彰

國憲均奏入

上命軍機大臣傳諭額勒登保曰此次額勒登保分飭楊遇春等截剿高三馬五股匪共計殲擒不過

一百二三十人額勒登保以現在餘匪無多飭令
楊遇春等分投搜捕而龍唐等逆分爲二股向得
勝坡文彩溝等處逃竄其紫陽之六道河斑鳩關
一帶亦有龍唐等逆分股之賊竄匿額勒登保渡
江後卽趕赴西鄉之王黑壩一帶相機剿辦所見
甚是昨據德楞額奏報已赴平利大寧交界處所
遏截龍唐等逆東竄之路今額勒登保又趕至王

黑壩一帶迎探截擊所有此股賊匪卽責成額勒
登保與德楞泰等併力迅速夾擊卽在漢江南岸
悉數殲擒不可稍留餘力其川東雲陽一帶辛陳
湯劉等股現有勒保督同七十五薛大烈等在彼
剿捕自可無庸兼顧至高馬殘敗餘匪僅有四五
百人楊遇春格布舍張鳳等跟蹤追剿又有慶成
九十分路攔截無難剋日掃除額勒登保務卽催

令上緊剿盡勿稍遲緩至冉學勝一股已竄過棧
西長麟現在兩當攔截尙不至深入甘境應卽轉
飭該督卽在兩當一帶奮力殲除不得僅以逼回
陝境了事再現在南山內祇有伍逆及高二餘匪
在彼逃匿勢已窮蹙何以穆克登布豐紳等剿辦
多時尙未殄淨額勒登保更當上緊飭催將山內
零星賊匪迅速掃淨騰出兵力赴漢江南岸會剿

勿令再有牽綴至審訊王廷詔供詞及將圖影經
卷等進呈朕閱經疏內詞語俱係粗鄙不通之詞
斷無信奉之理而匪徒等互相傳習愚民被其哄
誘可惡又復可憫額勒登保當傳知各軍營出示
曉諭以首逆王廷詔擒獲後搜出經卷疏頭皆係
編湊無稽之詞毫無文理王廷詔爲白蓮教首伊
旣被擒其餘各首逆亦必速就殄滅爾等何苦從

逆身陷陷奔又王廷詔供內有教匪畏罪不敢投
出之語前此節降諭旨除積惡首逆數人外其餘
自賊中投出者概不加罪卽被賊匪割去髮辮面
刺蓮花者但經投出地方官一體收留撫卹務令
安插得所汝等斷不必心懷顧慮如此剴切開導
從賊之人共知得有生路自必相率來投此亦解
散賊黨之一法其擒獲首逆王廷詔出力人員除

楊遇春張鳳格布舍三人前經降旨給予議敘外
藍翎甲兵德勒奇善將該匪抱住始就擒縛實屬
奮勇額勒登保業已遵照前此賞格將該員加二
等賞給五品頂戴花翎並賞給銀二千兩著卽以
三等侍衛陞用俟凱旋後卽留京當差二等侍衛
噶拉藍翎侍衛定色龍上前接應亦屬出力著各
加一等陞用侍衛傅陞噶達龍協領全德清善帶

領馬隊官兵沿途追殺多有斬獲均著交部議敘
清善並著賞戴花翎其餘出力之都司祝廷彪璩
嘉驥著賞換花翎甲兵委官烏爾滾驍騎碩蘭保
守備張玉璧千總馬柱甲兵色克通額多穆布提
兵丁周永明陳連陞李廷玉鄉勇黃璉陳魁朱起
才俱著賞戴藍翎其從賊隊中投出現充鄉勇之
顧應全苟璜亦著賞戴藍翎以示鼓勵其王廷詔

一犯仍遵前旨派委安幹員弁迅速解京盡法處
治至前令窩星額等攜餉犒師原諭令賞給經畧
叅贊兩路軍營今額勒登保所帶官兵多已派交
楊遇春等分帶剿賊若因不在經畧軍營轉不得
賞殊未允協額勒登保素爲公正自必不肯如此
應將此項賞銀分賞楊遇春等所帶兵丁仍由經
畧指定頒賞以昭公溥所有在樊家嶺殺賊陣亡

之都司海進龍著咨部賜卹

上又命軍機大臣傳諭湖北河南各督撫曰額勒登保奏摺獲積年教首王廷詔訊問供詞並搜出經卷等件據稱伊係河南西華縣人經卷二本是伊祖父王珊傳留伊在河南湖北交界地方往來經過遇見燒香念經人家取出經卷無不稱爲老掌櫃子孫共相敬重後因傳教人多被官府查拏受

屈又被地方棍徒詭詐借官挾制衆人纔想造反等語向來楚豫地方多有持齋念佛背誦經咒之人惟因地方棍徒借端勒索而地方官公差四出肆意搜拏以致激而生變教匪起事之故實由於此朕節經降旨令該督撫將僅止習教者無庸查辦其有藉傳教滋事者隨時懲治並頒發御製邪教說明白宣示至爲詳盡今王廷詔既供豫省及

襄陽燒香念佛人數尙多著書麟倭什布吳熊光
等如有真正邪匪借燒香名目作奸犯科者自應
有犯必懲不稍寬貸倘鄉愚無知不過吃齋念佛
並無不法事跡斷不可有意搜拏轉令不肖官吏
多方訛索別生事端也